



牽電火

囡仔時代，阮躑佇倚海的田庄，雖罔倚海煞無靠海咧趁食，躑田庄煞無咧作穡，彼是因為爸仔厝內無祖產，出外討趁，留阮姊弟仔恰阿母佇庄跤照顧阿媽。厝內散食無牽電火，點的是番仔油燈，日頭若暗，厝頭前的熊叔公仔個兜的電火就光 phà-phà，阮兜是暗挲挲。熊叔公仔個厝佇阮的頭前落，日頭若暗，看著光焱焱的電火，阮姊弟仔會走去窗仔邊欣賞。看彼人影一逝來一逝去，親像咧搬電影咧，就足欣羨人兜有電火。

一直到阮讀國校，阿母智覺著厝內無電火袂使得，就恰熊孀婆仔參詳接電火的代誌。寢頭伊攏無答應，後來阿媽出面才共代誌撫好勢。想著阮兜就欲有光明的一切矣，阮攏歡喜甲睏袂去。

牽電火彼工，是阮五个囡仔上歡喜的日子，等袂赴日頭趕緊暗，就坐踎大廳等欲點電火。阮母仔講猶袂使得，愛等到日頭落山無看著人面的時陣才會用得點。阮姊弟仔就乖乖仔坐踎椅條等，看日頭落山無看著人面矣，阮母仔才共電火切予著，五个囡仔疋歡喜甲蹣蹣跳。

想講阮兜有電火矣，毋免閣過彼款無火無目的日子。想袂到無三月日，熊孀婆仔來共阿母講，無欲閣予阮接電矣，講阮用電傷傷，愛家己想辦法。這聲害矣！母仔閣共伊拜託，講囡仔欲讀冊無奈何，請伊手梳擗懸予阮方便，阮會使加出寡電錢。了後，阮兜才閣有電火。條件是到暗才會使點，食飯飽就切化，而且干焦會使房間點五燭的、廳裡十燭的。一直到阮讀三年仔，功課有較重，阿母閣去予人倩作穡挲草，我日時愛鬥顧小弟小妹無閒頃頃，著愛利用暗時才加減看一時仔冊，攏愛利用逐家咧睏，差不多翻點的時跔起來讀冊。這個時陣，阮會共電火球仔偷換做二十燭的，讀成點鐘仔才閣走去睏，按呢，就無人會知矣。哪會知去予熊孀婆仔發現，閣去予加祛電火錢。

母仔講：「人散閣較愛會長志，毋通予人看袂起！別人無義務予咱倚、予咱靠。咱家己種一橫，較贏看別人！」所致隔轉冬阮兜就家己牽電火矣。

作者：黃惠祺

☆詞彙學習☆

【趁食】thàn-tsiáh：討生活。
【討趁】thó-thàn：工作賺錢來過生活。
【落】lòh：一宅之內成排的屋子一排叫一落。
【智覺】tì-kak：察覺、發覺、意識到。
【參詳】tsham-siông：又唸作 tsham-siàng。商量、交換意見。
【寢頭】tshím-thâu：起初、起先。剛開始的時候。

【椅條】í-liâu：又唸作 í-tiâu。長板凳。木製的狹長形板凳。
【囡仔疋】gín-á-phí：小毛頭。
【手梳擗懸】tshiú-se-giáh-kuân：高抬貴手。
【翻點】huan-tiám：過午夜十二點。
【燭】tsik：計算光度的單位。
【祛】khioh：收集、收取。